

重訂四書說叢

七

無回輟 後學

章如錦無文

述而章

此非謙詞、亦無警醒當世的意思、是真實話、人唯不得古人之心、故覺有自己聰明意見可用、已得古人心、自然信得古人過古人的精神、便是我的精神、古人的說話、便是我的說話、何須更贅一詞、故夫子贊修刪定、只是有減、並沒有增、無容增也。述而不作、信而好古、非予私見也、竊比老彭焉耳、次句不必作

推原說續張子云孔孟而後其心不傳如荀揚皆不能知愚按夫子信古傳述蓋是其心相湊合處慈湖云古人有道我與之同故深信深好之不知道者不足以與此。

默識章

張南軒云默識非意言所可及蓋森然於不睹不聞之中者也湛甘泉云識非有物默識非有時太公順應冥會而已不是息心除妄念只緣無事可商量度幾近之顏子不違如愚是此境楊慈湖云默而識之覺也不可思不可言也故曰無知也易曰神而

明之。近溪云：人果於默識中得妙趣，如知酒之美者，自然喜人共飲；知棋之意者，自然喜人共下。安得有厭？安得有倦？李宗謙云：學不厭誨，不倦。夫子既自任云爾，此處又云：何有於我何也？直是加一默識。在上地位，自別以默識而學，其不厭處，乃無言之學。以默識而誨，其不倦處，乃無言之誨。分明是聖與仁地位，分明是與天道同體。爲於穆不已之純，與天道同化。爲時行物生之妙，無些毫口耳意思。故曰：何有於我？何有於我哉？虛設一境，以自按與我無能焉。意同，非推開語氣。續

德之章

總是一條孜孜汲汲。唯日不足的肚腸。若說待不能而後憂則淺矣。一說動便纔見德又不修。學又不講。義又不徙。過又不改。若論道理。則講學所以修德。而徙義改過正講學之實事也。

燕居章

天天卽在中。申之中。形容不盡。所以爲妙。圈外程子註是。

甚矣章

尋孔云。夫子一生無日不思量相天下。所以不夢見。

他人而獨夢周公。至末年見世不用。方說出心事。一說龍溪云。夫子欲行周公之事。成東周之業。豈不是好念頭。此尚爲放不下的好擔子。及至晚年始全體放下。此是學到熟處。所謂從心不踰距也。張無垢云。向也於公隔一重。尋思常在夢魂中。如今已是心相識。你自西行我自東。此意殊妙。然亦後人規模聖學之詞。若夫子則實實嘆精神之衰耳。不自知之也。豪傑作事。亦仗色身。不復夢公。精神非昨矣。若云志衰。老至而偷。豈是夫子。續

志於道章

筆乘云。志於道。猶有二也。據於德。則得矣。猶有迹也。依於仁。則化矣。夫何爲哉。是麤皆精。是象皆神。藝卽道也。道卽藝也。特游之而已。是依仁之熟境也。道德仁藝本一物。志據依游亦一心。因功候生熟而異名耳。志道據德依仁時。豈能一日離藝。但不可謂之游耳。續李卓吾云。此是漸入佳境意。與知之者不如好之者。好之者不如樂之者同。李有時義甚微。陳氏云。據如執杖。依如着衣。朱子云。依如依乎中庸之依。相依不舍之意。此心常在不令少有走作。無物欲之累。而純乎天理。道至此亦活。德至此亦活。莊

生曰。用志不分。乃疑於神。只一志不斷滅。自然有此等境界。依仁以前之藝格物之格也。依仁以後之藝。物格之物也。續

束脩章

此夫子自發其誨人不倦之心。言外便有人不須疑畏意。束脩甚不重。正不須從別說。

不憤章

承上章說來。言雖未嘗無誨。亦須顧人之可施與否耳。袁了凡云。三段開說。憤悱在未教之先。反復在已教之後。三隅借言推類。不是曉得道之全體。如曉

得全體何容再復教人之法最忌說盡依我作解障彼悟門此大病也昔人云我口裏說來不中汝用香巖感漚山云重他當初不與我說破善教善學從來如是續

子食章

慈湖云此與鄉黨一篇所載皆明聖人之自然耳天道在聖人當哀而自哀當樂而自樂當敬懼而敬懼當舒徐而舒徐當微哀而微哀當極哀而自極哀當甚敬而自甚敬當小敬而自小敬不待斟酌審處聖人之心自如此也故曰成性存存道義之門天下無

窮之意皆從性中出也。宇泰云、聖人萬物一體。癢、疥、疾、痛、無不相關、無慘、舒、哀、樂、以天下之慘、舒、哀、樂、爲慘、舒、哀、樂、而哀、慘之心爲尤勝。故內典言佛之所緣、緣苦衆生、而又讚佛爲大悲者此也。

用行章

紹聞編云、用行二句、當就兩個則字看、用之則見成、將出來、舍之則藏了、兩個則字、如霽則行、潦則止、兩句合看、方見其妙、一用則精神聚之於用、方是行、一舍則精神聚之於舍、方是藏、如春秋一用孔子、便幹出許大事業來、顏子居陋巷、將他生平學問、盡數

藏了。到今只知他是個聖人求其言語文字之藏了。不可得。必如是乃謂之行藏。鄧文潔先生如此說。要知轍環用流。未嘗不藏。簞瓢陋巷。未嘗不行。方是素位之學。夫子與點正同此意。會得此意。無處不是道理。行三軍更不須說了。夫子之與顏子。非出處也。本體也。惟本體一絲不掛。故用則行。舍則藏。無事不可。子路却認在作用上。故設有能有不能。不知胸中碍一勇字。如何使得。續李孟誠云。誰人不是用之則行。必無不用而行之之理。誰人不是舍之則藏。必無有舍而不藏之理。只是幾微毫髮。視用舍不能。

如寒暑之去來視行藏不能如晝夜之夢覺則於用處必有快其順者快卽是加於舍處必有見其怫者怫卽是損朱子曰本須全在無所係累處

富而章

知新錄云好字不可作色相不可說所好何物大意只是破人求富之念引人從好意輕此夫子倒身商量語人各有好夫子非強人從我之好也特欲破人求富之惑耳續

子之所慎章

此記者旁觀夫子覺得三件如此其實夫子戒慎恐

懼。無念不慎。無事不慎。若必於此三者而獨慎之。亦何以曰無衆寡。無小大。無敢慢乎。聖人無所不慎。然大處現大小。小處現小。故記者於此三者尤見得。一說。解醒云。齊戰疾。是形容孔子戒慎之象。非謂唯此三者加慎也。張元長云。豈其齊耶。豈其戰耶。豈其疾耶。抑何戰兢惕厲之至也。若不以心而以事。將聖人亦有不慎之事乎哉。

聞韶章

大凡形容不得者。形容則淺。夫子贊韶曰。不圖爲樂之至於斯也。記者記夫子之間韶而曰。三月不知肉

味皆形容不得。語後人曰：夫子如何贊韶之妙？夫子如何好韶而至於忘味？便是癡人爭夢矣。口義云：夫子聞韶如聖人，見聖人便曉得他心事。若大賢以下，便不能如此。季札亦只是想像個意思而已。還落第二層。東坡論語解云：孔子之於學，習其音，知其數，得其志，知其人，其於文王也，見其穆然而深思，見其高遠而遠志，見其黯然而黑，頤然而長，其於舜也，可知。是以三月不知肉味。

衛君章

吳因之云：冉有子貢之疑，絕非嫡孫當立之說。既拒

親父何論嫡孫此三尺豎子知其不可與也然則爲何當時蒯瞶以殺母得罪於父晉雖納之衛人孰肯君之衛人旣不以瞶爲君公子郢又不肯受使輒又不立則衛之社稷不祀矣社稷爲重或者父子爲輕穎悟如子貢而不能決衛事者以此然必以夷齊爲問何也夷齊之讓亦國家存亡之所係當時夷齊旣去幸國人君其仲子使仲子復不受而去則孤竹之統絕矣怨乎一問正在於此方讓國之時爲父子一爲兄弟未暇念及國之存亡事久之後徐思前日之讓幾成亡國大彙能無咎悔不知古人世守之土

雖重然必先論父子兄弟後論社稷。今伯夷求尊父
命。父命尊矣。叔齊求重天倫。天倫重矣。其事已畢。其
心已安。彼中子之立不立。孤竹之祀不祀。以視求仁
其小者耳。當日固無逆計。後日又何悔恨。由是觀之
然則君臣父子之間。非通權之地。土地人民與父子
兄弟無較輕重之理。衛輒固不得援存國之義以贖
其通天之罪。故曰夫子不爲也。通章精神只在怨
乎二字上。姚承菴云。子貢資識極明。敏輒之不可
爲已略見之矣。特求夫子亦照勘耳。觀其舉夷齊爲
問。自見得。

飯蔬食章

亦字最活。曰在則有不在矣。曰亦在斯無不在矣。口不義而富且貴。可見義的其樂便與蔬水無二。此便是用行舍藏。無可無不可處。樂不因蔬水富貴而有。却非先有一個樂在。如此方是吾儒之學。管登之云。此必夫子周流列國。值此困境。與門人相慰勉之詞。不義富貴必有所指。今不可考矣。論其世則多爲彌子瑕之徒而發。

學易章

楊貞復云。易道唯虛。與易合則心虛。一情之消長進。

退無不自覺。所以能無大過。易之作。以前民用也。無大過。全是幾先之學。善必先知之。不善必先知之。故可以無大過。結

雅言章

夫子渾身是思無邪。執中。毋不敬。故隨日用間拈起。便是。非夫子有意雅言也。經自不離於夫子之言也。記者從旁窺之。而以爲雅言耳。其實謂夫子雅言。易雅言春秋亦可也。此是記者見得。亦終是記者說話。記者記夫子之言多矣。如子以四教。子罕言子不語。皆列其目而止。而此獨多着皆雅言也。一句何

也。此是述詩書執禮而又尋味之詞。蓋恍然會意夫子平日所言莫非是也。不然多着此語。幾於贅矣。不曰子雅言而曰子所雅言。所字政與皆字相照。許敬菴云。記者因夫子學易之語。而記其雅言。皆曰易雖未易輕語。而詩書禮則夫子之所常言者耳。

葉公章

疑問云。分明說一生是學。却不露出學字。朱子云。觀天地之運。晝夜寒暑無須臾停。聖人爲學亦是從生至死。只是如此無止法也。延平云。元晦謂發憤是求道之切。聖人是道理中流出。卽求道之切。恐非。

所以言聖人也。此三句只好渾渾作氣象看。則見聖人渾是道理。不見有身世之礙。故不知老之將至云爾。慈湖云。孔子唯言憤。不言所憤而爲之者何事。唯言樂。不言所樂者何意。若有事可知。有意可言。則無以爲孔子。故曰。吾有知乎哉。無知也。人心卽道。是謂道。祝子小言云。知解自通。神理自塞。常人漫以通處爲通。不知求其塞處。故不憤。聖人直以塞處爲塞。不肯妄認爲通。故憤。云爾。說得尋常平易。此等處。俱聖人自不知覺發洩出來。不知愈平易愈不可及。

生知章

兩之字分明有所指。但聖學後人不可思議耳。管先生謂聖人所志必乾元無極之學。亦億之也。曰求之者也。語氣原未歇手。朱子云。聖人看得地步濶。自視猶有未滿足處。所以其言如此。非全無事實而設言以勉人也。此生而知之。蓋指先天不違之聖人。如伏羲之畫八卦。神農之嘗百草是也。夫子述而不作。故自好古敏以求之。此非論知也。表已述而不作也。兩之字分明有所指。若拈知字任人周旋。兩之字定作兩解。續

不語章

高中玄云。子之不語何意。曰。惟懼人之惑也。力與亂。懼人之逞也。自不可語。神非人之所能知。故亦不語也。曰。不語而已。記之謂何。曰。正唯聖人能。不語也。如伊川先生。每遇恠異之事。必力破其無意。豈不善然。無證之辨。人必不信。故知不如不語之爲妙也。曰。陰陽不測之謂神。窮神知化。德之盛也。何謂不語神。曰。此易理之精微。故於繫辭一二言之耳。平日言語。何嘗及此。然平生止此一二言。則其不語又可知矣。陸象山云。夫子只是不語。非謂無也。若力與亂。分明

是有神性豈獨無之人以雙瞳之微所矚甚遠亦性矣苟不明道一身之間無非性但玩而不察耳

三人行章

舉三人以槩交接舉行以槩日用舉善不善以槩善惡變態之極致知此則無往不可以得師

天生章

中玄云天生德於予桓魋其如予何何又微服過宋曰天命當安人事不可不盡不然立於巖墻之下豈是正命天生德於予桓魋其如予何聖人之氣不與兵氣合也此等是聖人自信處出口自不覺耳

夫子曰。天生德於予。桓魋其如予何。顏淵曰。子在回何敢死。是何等抱負。是何等決裂。

二三子章

孔子行處。如只草草看過。着衣喫飯。早起夜眠。默坐譚論。與凡人無二。有何奇特。二三子豈不解着衣喫飯。早起夜眠。默坐譚論。孔子又何必與二三子。二三子又何必孔子與也。故知文章之卽性道。方識孔子之與。悟性道之卽文章。方能得孔子之與。隱字不就言說。是對顯說。是丘也。三字是喚醒語。直令二三子於此識取。無行不與。照天何言哉。看自得。

晦堂問黃山谷無隱之義。山谷詮釋再三。晦堂終不
然其說。時暑退涼生。秋香滿院。晦堂因問曰。聞木樨
乎。山谷曰。聞。晦堂曰。吾無隱乎爾。山谷乃服。寶印
云。非獨今世學者不見夫子之心。當時顏子號爲具
體。盡生平力量。只道得瞻之在前。忽焉在後。如有所
立。卓爾竟捉模未着。而聖人分明八字打開。向諸弟
子曰。吾無行而不與二三子。以此觀之。聖人未嘗迴
避諸弟子。諸弟子自錯過了。管登之云。程子曰。聖
人之道。猶天然。門弟子親炙而興及之。然後知其高
且遠也。使誠以爲不可及。則趨向之心。不幾於息乎。

故聖人之教。嘗俯而就之如此。愚按程子斯言。亦屬影響。孔子年踰知命。而門人從之周流。豈無性與天道之含藏而不盡露者。門人之疑其有隱。非過也。但教必當機。故有顏子子貢之所得聞。而諸子不得與聞者。則非隱也。迎其機耳。悟到天不言而時行物生處。則隱不隱。又不在於言不言。此惟顏子默識之。非可槩責之二三子者。故但提身教曰。無行不與。斯其徹上徹下語也。先儒慣以道無精粗之影見。顓頂聖學。大率推敲禪語而方圓之。不無臨深爲高之過。愚亦不敢承焉。

四教章

一說四者有由博漸約之意。○既云四教是實是四事。如此說似於四字未合耳。不曰子教四而曰子以四教。四者缺一不可也。但不可專謂由博入約耳。今文莫十室二章看自得之。續

聖人章

今以見聖之思歸之有恒者。聖人亦不過恒到盡處。故一有恒便足接于聖之脉。非由善人由君子而漸至於聖也。未節非無恒之弊。正歎有恒併不得見意。君子是中行善人近狂有恒近狃。此卽思狂狃意。

聖人者。恒人而肯安心者也。難乎有恒者。慕聖人而失其夫婦者也。三代以上。聖人多。而後日少者。以爲之者之衆也。不爲縱不至聖。聖胎猶在。爲則脉斷矣。故夫子嘆之。續

子釣章

這章道理。似近而遠。似淺而深。直是記者見得聖人。心裏天理渾然。如天空海濶。鳶飛魚躍。得趣上下了。無拘着牽係。各任生成。分明與天地同流氣象。故把此釣弋二事言之。其實妙理全在聖心。無物上。世儒不察。謂聖人爲賓祭。故不得已動殺機。其取物之中。

却有不盡取之仁。噫。歎此其論聖心亦淺矣。聖心
渾然仁體。發皆中節。與衆同鈞。鈞自不綱。與衆同
弋。自不宿。謂聖人有一念不得不傷戕心。不是謂聖
人有一念曲加覆育心。亦不是。自然而然。方得無意
無必的道理。觀此可見聖人心事。明白坦夷。遇民
自仁。遇物自愛。存於心便自施恩之序。發於政便是
搏節愛養之仁。覺外教紛紛戒殺放生。俱屬多事。孟
子所謂愛無差等者也。

蓋有章

夫子嘗語子貢曰。女以予爲多學而識之者與。予一

以貫之。而此復居於知之次者何也。所謂次者。對生知言亦論其從入。非論其究竟也。聞見而至於擇識。則由粗見精。由博歸約。聞見之知。已莫非德性之知矣。此正一以貫之。及其成功。一之境界也。特其從入之路。較之無所依倚。神明默成者。微隔一間耳。非謂已至於知。尚有孰爲上孰爲次也。陽明說似有偏主。不如舊說之長。

一說。陽明云。此正所以明德性之良知。非由於聞見耳。若曰多聞擇其善者而從之。多見而識之。則是專求諸聞見之末。而已落第二義矣。故曰知之次也。夫

以見聞之知爲次。則所謂知之上者。果安所指乎。是
可以窺聖門致知用力之地矣。上知亦不廢見聞擇
識。但從心體上起知者。見聞擇識皆其故物。與從見
聞入者。由來不同耳。子曰生而知之者上也。學而知
之者次也。是此章疏。

互鄉章

次節文理自順。似無簡錯。王宇泰云。於此見聖人
心體如鑑之空。如水之明。物來卽照。物去則化。不億
不逆。唯有見在一念。今人紛紛計過去未來。所以動
念成妄。

仁遠章

衡齋云、醫書以手足痿痺爲不仁。言弗覺也。誠覺則痛癢流行。而仁在其中矣。豈覺之外。別有痛癢。別有仁哉。論其機之捷。則曰我欲仁。斯仁至矣。論其體之微。則曰君子而不仁者有以夫。張南軒云。不曰至仁。而曰斯仁至矣。蓋仁非有方所。而可往至之也。我固有之也。筆乘云。此孔門頓門也。欲卽是仁。非欲外更有仁。欲卽是至。非欲外更有至。當體而空。卽事成覺。非頓門而何。管云。欲仁。仁至。所謂從心所欲。不踰矩也。熟仁不如夫子。欲之而亦卽至乎。曰仁者。

只是無我。但不爲軀殼起念。將身實在天地萬物之中了。無間隔。便是仁體。何遠哉。

陳司敗章

司敗是埋娶吳一事而問。夫子是據大槩而答。是兩不相照者。及司敗明明說出。昭公果是不知禮。夫子果是失言。故蹙然以過自任。此正聖人明白坦易處。與諱君失意不相干。若使司敗問昭公娶吳爲知禮乎。夫子必不曰知禮。烹芹漫語云。聖人聞過自以爲幸。更無掩飾。後之訓詁者。便替孔子尋出路。此正是黨。此等景象。不可不思。

人歌章

註中樂善最好。歌而反。反而和。不知善之在彼。不知善之在我。亦不可謂彼之善。不可不謂我之善。大舜有大焉。善與人同。便是同此氣象。古者一歌一和。此常事耳。獨子不然。必使反之而後和之。記者從旁拈出。遂覺沉綿反覆之致。千古如畫。續

文莫章

文莫吾猶人也。言我無不可以及人。此正賤文之意。註中不能過人。而尚可以及人。未得。躬行卽是文之根於心處。四教一曰文。顏子曰博文。聖門未嘗

賤○文○也○。但○以○收○之○踐○履○者○爲○真○耳○。玩○語○氣○是○體○味○於○分○合○之○際○。而○覺○難○易○貴○賤○迥○殊○之○詞○。續

若聖章

均○一○學○不○厭○誨○不○倦○。夫○子○以○爲○学○者○事○。從○爲○與○誨○上○說○。分○明○謂○仁○聖○的○人○。無○爲○而○成○。不○言○而○化○。而○我○猶○爲○與○誨○特○不○厭○不○倦○云○耳○。若○謂○此○喫○力○工○夫○也○。公○西○華○不○能○学○。意○謂○此○乃○仁○聖○者○事○。從○不○厭○不○倦○上○說○。有○此○貫○徹○始○終○。物○我○無○間○。豈○不○是○純○亦○不○已○地○位○。除○非○仁○聖○不○能○。所○以○能○不○厭○不○倦○處○。是○仁○聖○公○西○華○識○破○其○所○以○然○。若○字○是○虛○設○一○境○。以○自○按○之○詞○。與○君○子○道○

者三語意相同。抑字正相照。若字續管登之云。爲聖爲仁何別。曰爲聖尚乎思。爲仁尚乎學。終日不食。終夜不寢以思。此爲聖之事也。已欲立而立人。已欲達而達人。此爲仁之事也。其本則一以貫之。今人將不厭不倦。做題目在手裏。做安能得真。不厭不倦也。故曰正唯弟子不能學。

請禱章

夫子不言無禱之事。而曰有諸。令其思禱之理也。曰丘之禱久矣。是自按之詞。所謂修身以俟之。所以立命也。中玄疑其自負以抗神明過矣。

奢則章

此章不是平較奢儉的利害。全是夫子惡奢之深。卽儉形奢。極言奢之爲害。以維持世道。故發爲此言。若曰與其至於如此。無寧如彼耳。說個不孫。便是最緊策人心處。儉已是弊。固又是弊中之弊了。夫子豈取之。禮與其奢也。寧儉。戚矣。與其不孫也。寧固。益戚矣。非猶有取于固也。甚不孫之不可居也。續

坦蕩章

淮海近語云。去了長戚之心。便是坦然之境。

子溫章

義府云。各句不是兩樣相濟。溫之恰好處便是厲。威之恰好處便是不猛。恭之恰好處便是安。厲正見溫之妙。不猛正見威之妙。安正見恭之妙。此等處如觀摩尼珠。如以燈取影。說不如是不可。說如是又未必是不得已。而兩存之。以俟人之意會。舊說溫之恰好處是厲。厲正見溫之妙。處等語。俱是笨話。續初問云。溫而厲。處便是威。威而不猛。便是溫。溫與威。處便是恭。不加一毫意思。便是安。橫渠嘗言十五年學。個恭而安不成。明道曰。可知是學不成。有多少病在。○愚按。病在學上。知非學之所能成。則知夫子之恭。

而安矣。

泰伯章

泰伯之說論者紛紛。皆誤於實始翦商之一言。不知此魯頌之夸詞。非當時之實錄也。考太王遷岐。在小乙之二十六祀。繼值武丁中興五十九年。歷祖庚祖甲之二十八祀。而文王生。又歷廩辛庚丁武乙大丁帝乙以至紂。而商始亡。常太王之時。周雖強大。不過一侯國耳。武王十三年以前。尚猶事商。而況當全盛之日乎。翦商之事。太王不但不出之口。亦必不萌之於心。太伯雖智。亦安能逆知二百六年以後之事。而

輒以未必然之事爲讓哉。太王之欲傳季歷。不過以子賢孫聖。望其國祚之綿洪耳。大伯承父志於幾先。挈弟以行。毀形自廢。使欲傳者無舍長立少之嫌。受之者忘以弟先兄之跡。彼自在父子兄弟間。獨苦其心耳。與商家無與也。若曰明却侯封。陰辭大業。則是太伯取他人非據之物。與夫渺茫不可知之事。以爲已自處於忠孝。而登父與弟於叛人。此迂險之妄人耳。何以稱至德。或曰夫子何云。以天下讓。曰此後人觀已成之勢。而追論當日之情事。假使太伯不行。則不以身王。猶當追王。是太伯當日之國。固今日之天

下也。謂太伯之讓國。卽讓天下可也。此後人之詞。非真以天下讓也。曰民無德而稱者何也。曰凡讓者我推彼受之名也。有推有受。則有可稱。太伯托採藥而行。人直謂之採藥耳。卽太王王季之授受。亦自以爲長子不返。嫡兄他適。若不得已而傳之少子。主其宗祧者。其去時一段委曲周旋之意。人誰知之。善乎范曄之言曰。太伯以天下而違周。未始有其讓也。若太伯有其讓。則必有其稱。如夷齊季札。千古知其爲讓。人矣。亦豈可當至德也哉。三讓猶言著實讓也。著實讓而卒無得而稱。所以爲至德。論衡赴喪三讓之

說未可信。夫子之贊舜禹至矣。止曰有天下而不與焉。至堯方曰民無得而名焉。周太王王季文王皆聖人也。却不能謂其與天下無關涉。卽如文王以服事殷。不知費了多少苦心。方推得天下。離了身子。孰與採藥一行天下二字。再拈他不上。故曰無得而稱焉。續

夫子稱文王爲至德而不及武王。稱太伯爲至德而不及王季。且曰未盡善也。身不失天下之顯名。若有刺焉。蓋孔子殷人也。而又周之臣子也。亦知天命有在。商不得不代而爲周。而時動故國之感。其稱文王

若惜武王之不幸而不得爲文王其稱泰伯若致憾於王季之不能爲泰伯言外之微意猶可得而想見焉、

恭而章

義府云、張子合二節爲一章。人道知所先後者。以禮節之也。恭慎勇直不可過。而仁厚之道。雖過不過焉。不可過者。當以禮節之。雖過不過者。乃所以爲禮也。凡六句皆以則字爲轉。上四則字其弊也。下二則字其效也。弊卽效之不善者也。又云、當恭而恭。當慎而慎。當勇而勇。當直而直。皆生心之所不能已也。此

卽吾心之天則也。天則曰禮。無天則非心之所不能已者矣。故不復名爲恭慎勇直。

啓予足章

李九我云。曾子非徒以手足之不毀傷爲言也。天之所以與我者。大者能立。小者不奪。踐形盡性。一毫無所虧欠。方纔了得父母所生的事。曾子一生只是這一個念頭。人若有此心。便是逢于之身。首分裂與曾子之啓手足一般。不然便老死牖下。亦與刀鋸慘辱無異。故觀此章者可以醒。李漸菴云。曾子一唯之後。生死了然。故啓手足之假豫從容。無異平日。豈以

恒化爲心哉。論語大意云。與孔子曳杖逍遙。彷彿一段氣象。豈在生死岸頭。臨時處置者乎。真西山云。曾子啓手足以爲知免矣。而易簣一節。猶在其後。假令終於大夫之簣。猶未爲正也。歸全之難如此。○愚謂易簣非曾子緊要事。因仲子提大夫之簣華而皖。故易之。亦見其臨終不亂如此。即使不易。亦不足以累曾子也。使其有累。則當日不寢之矣。宋儒每於聖賢小節上驚天動地。

一說管登之云。使弟子開衾而啓手足者。永訣之時。以身顯道也。道在人形。卽形卽性。自手至足。全體宛

然何所隱。亦何所缺也。曾子是時。蓋已了徹一貫之道。故其發於門人者如此。又云。曾子早歲。雖聞一貫。然不廢三省之功。至是則已廓然大徹於無悟無修境界。殆呈夫子無行不與之身教示人矣。保身何足言耶。免從戰兢說。不從毀傷說。無疑也。獨怪先儒認當年之唯一貫。何太深。而訓啓手足之免毀傷。何太淺耶。蓋悟境難言矣。○說雖可喜。的是禪宗。

孟敬子章

吳因之云。曾子篤實的人。蓋棺言語如何。只向容貌詞氣上。理會三斯字。是他精神結聚處。本領正在這。

裏。斯者如响之應聲。如影之隨形。如吾身呼吸感召。斷斷不離者也。這全靠中心有主。平時心上做得個把柄在。故能如此不言而喻。若臨時襲取。救得一邊。須倒了一邊。縱修飾十分好。只是個堂堂乎張也。仔細看有多少暴慢鄙倍根本。君子所貴乎道。句斷。三是偶舉之詞。曰動。曰正。曰出。皆是不言而喻處。非有得於道。遠近之權。安得自由乎。以事字剔道字。以有司剔君子。見不獨當知所貴。尤當知所貴之不可不專。續管云。註云。道雖無所不至。然君子所重此三事而已。愚謂道卽一以貫之道。其言所貴乎道者三。

謂得其一而三善自從之也。非拘拘於容貌詞氣之間求道。玩三斯字自見。或疑既謂之道。則本末一以貫之。如何只教之重本。愚謂此必因其短而窺之。然亦教其重本。以該末。非教其舉本而遺末也。果能體驗平道而三善從之矣。又豈有不治之邊豆哉。無是理也。朱子云。李先生曰。曾子臨死。空洞中只餘此念。○愚謂正所謂一以貫之。

以能章

合五句看。方見得渾融虛靜之妙。不可過爲分拆。摠是形容之詞。聶氏云。能不能有無多寡之類。蓋自

會子言之有如此。而顏子則無所見。顏子渾是虛體而已。口義云。人若血氣未盡。則有能有不能。有多有寡。有有有實。有人有我。若天理中皆無之。顏子克已功至。胸中更無一物爲礙。都是天理用事。故曰幾於無我。又云。犯而不校。只是此心虛明之極。故外物動他不得。人心愈有則愈無。愈實則愈虛。蓋道理原是如此。不是有意。如有意則爲老莊矣。參元稽山承語云。或問犯而不校。與不報無道。何以不同。曰。有意無意耳。又曰。設使人有九分九釐。不是我有一釐。不是。亦是我犯。非人犯我也。聖門之教。只是自反。

自責故曰不校。必是我全無不是。人全無是處。然後
謂之犯。如此而又不校。愛敬調停之心。不倦不厭。方
是好學。義府云。苟知物我之無間。而萬物一體。如
一人之身。手足爪牙之相犯。斯無有校之者矣。會
子平日學問。極是用心於內。却猶有門戶可入。途轍
可循。此章境界。實未易到。爭如顏子當下直取。便與
太虛同量。故曰顏子沒而聖學亡。曾子至此亦恍若
有所見而發。此歎想在聞一貫之後耶。

託孤章

三句總一直讀下。歸重節上。非以才並言。程子分曉。

朱子文集云、蓋惟臨大節而不可奪。方見得可以托可以寄爾。

弘毅章

王宇泰云、謂之士。是聖賢路上人。與凡民不同。若弘毅便是擔上擔子。上聖賢路上去做。若是些小能解。便塞滿了些小室礙。便歇手了。依舊與凡民一般。紹聞編云、聖人與天同體。自無不包。不消說弘。與天同健。自然不息。不消說毅。在學者則不可以不弘毅。許敬庵云、弘毅得於天者。固多係於養者。亦大士不可以不弘毅。貴養也。孔門唯顏會可稱任仁。李

孟誠云、人在天地間、向何處安立、在吾身中向何處
識取。識得則任仁有分。且仁亦有何形聲。如何號稱
重。有何程度。如何號稱遠。任了仁。九竅百骸。不會加
了些子。如何叫做重。行了仁。閭域尚未踰。如何叫做
遠。知得重而後能任重。識得遠而後能道遠。不然只
是空言。須讓曾子獨步。剛正云、任重而道遠。言既
任重。又道遠。故下一而字。非兩者截然不相干也。註
以弘毅分屬之支離矣。使弘而不毅。則任處必不力。
使毅而不弘。則道遠者何物耶。疑問云、弘是心之
廣大而無限量。毅是心之堅耐而無歇息。無限量到

無歇息。是爲弘毅。毅卽弘之有終也。道遠是任重之殺尾。非二事。原旨云、仁以爲已任。只是說任重。死而後已。只是說道遠。不是做工夫。工夫在首句。紹聞編云、任仁與當仁不同。當仁是纔有志要幹此事者。任仁是身體而力行之。譬如有個千斤擔子。須擔子上了肩。纔喚做任重。管登之云、身任此仁。不至於死不已。此曾子之所以體一貫於忠恕。免戰兢於臨終也。然有個任重意在猶似如毛之輶。有個不死不已在。猶分生死之界。與孔子半途不能已。顏子欲從末之由心境。終一問。然

後知孔門之好學難言也。

興於詩章

此夫子進人以經術之實益。今人動曰。人心自有真詩。自有真禮。自有真樂。試思無所觸而能興。無所範而能立。無所陶而能成者。雖在上智。能有幾人。假令日與之言詩。日與之習禮。日與之和樂。雖下愚不肖。未有不興而立而成者也。可見經學。步步皆是實境。分明說興於詩。立於禮。成於樂。而反說不待詩而興。不待禮而立。不待樂而成。不獨開人廢棄經學之漸。亦非當日立言語氣矣。今人之說是聖人作經。

之精意。非後日窮經之實學。果爾則先王之太史陳詩。春官典禮。瞽宗合樂。俱是贅事。此便是清譚禍世之作俑。故不可以不辨。

民可章

二程云。不可使知之。非民不足與知也。不能使之知耳。耆舊續聞云。使字與孟子不能使人巧義同。聖人能以理曉人。至於知處。貴乎自得。非口耳可傳授。須知與老子民之難治。以其知多不同。朱子云。由而不知。不害爲循理。及其自覺而知之。則沛然矣。由之而自知。則隨其淺深。自有安處。初問云。聖人

只設得學校庠序司徒之官而已。知在人心。須自致力。聖人真無下手處。

好勇章

原旨云。兩亂字。生於兩疾字。天下之亂。未有所激而成者。好勇之亂。內激於不可忍也。不仁之亂。外激於不能堪也。是欲人思亂之所由起。

周公章

器不足以居才。雖才美如周公。且不足觀。况未必周公乎。其餘不足觀者。言渾身都是驕吝耳。亦何足以觀之哉。漢疏云。爲驕吝所掩。此語最好。盈盎醢醢。

投少毒藥。悉成毒矣。試問尚有醍醐否。故曰其餘不足觀也已。續

三年學章

三年中不唯時久。亦有學成技癢意。三年是活詞。如言三月不違仁也。至字不必另解。言念慮未嘗到穀上也。了凡云。心下見得不真。卽自認以爲學境。而渾身全入利鄉。凡念頭默默打此經過。卽是至也。

篤信章

通章一好學盡之矣。人縱天資篤信。而不好學。則生

死之關。治亂出處之際。必不能一一討個分曉而得其宜。唯好學則雖當可以死。而亦必能盡其道。不區區以一死爲高。此善道全從好善中來。與下文不入不居則見則隱一樣看。皆學中事也。人泥其文。而以學守並言之。豈學之外別有守乎。末節亦非十分不好的。人。世固有一味頭的人。知窮之當固。而不知有道之不可貧賤。知道之當行。而不知無道之不可富貴。此正是篤信而不好學者。故耻之耻者。耻其不好學也。

夫子儘有自見得高處。如曰危邦不入。而終日入危

邦曰亂邦不居而終日居亂邦曰有道則見無道則
隱而一生欲以有道易無道至序次逸民則又曰無
可無不可蓋顯然將身剔出在外而見非區區立身
行已之常格所得拘者故曰聖達節

在位章

疑問補云謀計謀也計其善否因革而見諸行也故
唯在位而後可若孔之答丘賦閔子之論長府是議
也卽不在位亦使得

師摯章

訂釋云此必師摯適齊之後而夫子追歎之詞答

問云言師摯在官之始且莫說所奏篇篇皆美只奏
關雎一篇至卒章也洋洋乎盈耳矣曰關雎者舉首
篇以例其餘也世以關雎爲衆樂之亂非也
一說管云關雎風始卽以爲樂之首章而以至於亂
皆洋洋盈耳也

狂而章

與三疾章同意。

學如章

二句總是狀爲學之心不必作兩樣看如不及是趕
上前唯恐失是怕落後精神全在如恐二字

巍巍乎二章

此夫子就外象描畫三聖人。巍巍章不得增一心字。大哉章不得增一德字。

巍巍乎章

舜禹有天下而不與行。所無事。人心原無一物。一塵不染。舜禹之巍巍。得其心體也。不但戀他是與。卽解之使去。亦是與。憂勤要保守他。是爲已。是與。卽憂勤恐負天下。是爲天下。亦是與。蓋皆有一個天下在胸中。便爲天下動了。舜禹之心。清虛空洞。無一物矣。故把天下看得與已絕無相干。無之可有之。亦可辭之。

若棄。僊。受之。若固有。隨其所居。盡吾固然。聖人之心。有所不能。自己也。非知有天下也。經子瞻解云。王摩詩。曾是巢許淺。始知堯舜深。蒼生詎有物。黃屋如喬林。此卽儒者所云。一點浮雲過太虛。如此乃可言不與。乃可言巍巍矣。象山云。詩稱文王不識不知。順帝之則。康衢之歌。堯亦不過如此。論語之稱舜禹曰。巍巍乎有天下而不與焉。人能知與焉之過。有知識之病。則此心炯然。此心坦然。物各付物。會其有極。歸其有極矣。所過者化。所存者神。上下與天地同流。豈曰小補之哉。

大哉章

姚承庵云。此通贊堯之爲君。本文原無一德字。子臆解云。大哉堯之爲君也。以一句起。而其下每句形容其大。曰巍巍則天。曰蕩蕩無名。曰巍乎成功。曰煥乎文章。不容分斷。亦無二義。而朱子將上下段抑揚分說。若以文章爲不足道者。失詞氣矣。海蠡云。南華經曰。天之蒼蒼。其正色耶。其遠而無所至極耶。蓋世未有見真天者。見其狀若蒼蒼耳。世亦未有真見堯者。見其成功文章。巍然煥然耳。故曰唯天爲大。唯堯則之。唐堯一片本地風光。豈唯世人莫能見。卽

聖如孔子。亦不能見。孔子豈唯不能見堯。亦復不能自見也。不見之見。是爲真見。得此真見者。山河大地。牆壁瓦礫。皆是見堯也。故曰見堯於羨牆。○見與名不同。可見而不可名。朱註自妙。成功文章。是爲君所必不免者。然但見其巍乎煥乎。而莫能名其何以文章。則亦仍歸之蕩蕩而已矣。續

五人章

疑問云。此章非竝美周家才德之盛。夫子原是論才。於周而因。及於德。論武所得之才。而因及於文。蓋曰揖遜遠矣。周之德無媿焉。而濟濟多士。不及輔治平。

僅以數禍亂則其所遭不幸耳。其意致特深。此非
並論虞周之才不足武王之微詞也。首出治亂二字
已○有○其○意○虞○之○際○唐○以○治○繼○治○也○故○五○臣○敷○布○而○有○
餘○武○之○接○文○以○亂○繼○治○也○故○十○亂○勘○定○而○不○足○此○言○
外○意○也○九○人○而○已○下○陡○接○三○分○節○不○倫○不○次○大○有○可○
思○見○武○王○亦○非○無○可○際○者○也○而○不○能○際○故○周○之○至○德○
獨○歸○文○而○周○之○才○若○專○以○待○武○之○用○唐○虞○以○君○臣○而○
成○一○代○文○武○以○父○子○而○分○兩○時○人○才○之○生○亦○有○幸○不○
幸○焉○故○曰○才○難○不○其○然○乎○續○首○二○條○亦○夫○子○之○言○也○
一○治○字○一○亂○字○便○有○感○慨○先○叙○後○斷○文○法○如○是○耳○

舊解末節云。周之才皆周之德培養之。以待武王之
用。如此則文王雖無翦商之事而實有翦商之心矣。
大意只云周之才比隆於唐虞。而周之德非不足於
揖遜也。觀不曰文王之德而曰周之德可見。三分
有二。特就大勢言之耳。後儒遂以九州分之。大可笑。
夫子常常以舜武並論。真有可惜武王意。

間然章

夫子贊堯舜不容口。而於禹獨曰無間然何也。當此
之時。帝降而王。德降而功。世道升降之會議論易生。
故云。宇泰云。豐儉適宜。豈足以言無間之妙。其無

間者。乃菲處。致孝處。惡處。致美處。卑處。盡力處。血脉耳。斯須不仁不孝。便是漏逗矣。管登之云。禹傷父。極。故不知有南面之榮。而衣食宮室。過自損抑。情之至也。至於祀神治民。盡心盡力。又所以祗承舜禪。而不負神人之托也。然父雖受極。而九年治水之績。自在。其何嫌於配天。此麗於孝。鬼神美黼冕祀典中。而以元后盡力溝洫。則所以幹九年績用弗成之蠱。亦至矣。在堯舜本垂裳之餘事。而在禹則仁孝之大德。故夫子表之。若但言豐儉適宜。則亦君道之常耳。何足爲禹多。而夫子闢之如是。夫子曰。禹吾無間然。

矣。其湯武之微詞乎。

罕言章

王逸季云。罕言是記者之詞。不得說所以罕言之故。其所以罕言處。真不可解。凡記者之言。俱是各言其所見耳。如夫子終日言仁。如何說得罕。當是記者自見其罕。續

達巷章

張南軒云。黨人豈知本末精粗。一以貫之之道者哉。故夫子但舉一藝自居。而又於藝之中。偶居其最卑者。以見道之無不在。學至於聖道。與藝不得分之

爲兩黨人譏夫子之博而不知博之未始不約也。人知夫子之執御而不知御之未始非道也。吾執御矣。一以貫之者也。無所成名。博亦化矣。黨人之贊夫子原自無病。但拈一博字。徒博亦博。故子聞之。與門弟子閒商一過。拈一執字。則博亦不碍。假令有單舉執者。又安知不以博破之耶。此全是論道理。非抵對黨人也。續

麻冕章

此章是聖人慎禮之防。周末文勝。競趨靡麗。麻冕一事。駸乎有反朴之意。聖人從衆者。宗禮之儉也。臣拜

乎上尊卑之分素矣。違衆從下者。維禮之分也。俱是大關係處。漢疏訓恭儉。

一說歸重下節上。口義云。聖人言我何嘗泥古。如麻冕純儉。可從則從之。但此心過不去處。要從也。從不得。

絕四章

初問云。意必固我。四者皆無。原是心體。聖人只完全此心體。曾不知有四者。動亦定。靜亦定。約言之。只一虛而已。心體不可名狀。故記者就其所無者以名狀之。龍谿云。意是本心自然之用。如水鑑之應物。

變化云爲。萬物畢照。未嘗有所動也。惟離心而起意。則爲妄。千過萬惡。皆從意生。而固必我。盡從意成。母意則本心自清自明。不假思爲。虛靈變化之妙。固自若也。空洞無體。廣大無際。天地萬物。有象有形。皆在吾無體無際之中。隨感而應。而實不離本心自然之用。或以無意爲滅。意非也。滅者有意而後滅。母意未嘗有動。何有於滅。或以爲無惡意。又非也。善與惡對。心本無惡。有何善意。有善可爲。是爲義襲。非慊於心。誠僞之所由分也。或以爲非初學所及。又非也。初學與聖人。只有生熟。安勉原無二致。及其成功一也。

袁七澤云。吾人過去之心已往。見在之心不住。未來之心未來。本無意必。本無固我。人人日用。可以反觀。然則此四者。不特聖人無之。卽凡民亦未嘗有耳。聖人悟之。故有若無。愚人迷之。故無而爲有。聖凡之辨微矣。一說。毋禁止之詞。是知四者之病。而克之者。夫子本不生心。連母也用不着。故曰絕續。

畏匡章

文者道之所寄。言文卽言道也。茲是自任之詞。却不
得當我字看。猶今人說在這裏一般。將喪未喪。都活
說。乃未定之詞。蓋以斯文之興衰。決此生之存亡。非

矜天以爲重也。註添一轉。便說殺了。非聖人口氣。
管登之云。愚味文不在茲乎。及天未喪斯文等語。夫
子必有默與天通處。如夢周公。夢兩楹等兆。斷不如
後儒懸空以天自處。而漫言聖人無死地。蓋是時過
知命之齡已久矣。特難浪洩此幾於門人耳。然對回
賜二子必無諱。古未有以文爲統者。曰文在茲。創
語也。分明見飛龍之統。禪之見龍。以剛述贊序爲已
任也。與儀封人章正相照。續一說西伯幽而演周易。
是殆將繫易乎。續

太宰章

焦弱侯云。味道者務多。知道者棄多。忘道者不厭多。何者。知多之不爲礙也。然此非太宰之所及也。故夫子微示之曰。君子多乎哉。不多也。言外見以多求道。非其數也。其統之有宗。會之有元。何多之有。

有知章

敬軒云。凡物虛則有神。鼓虛則響。鐘虛則鳴。心虛則靈。疑問云。張子曰。洪鐘未嘗有聲。由叩乃有聲。聖人未嘗有知。由問乃有知。愚曰。由叩乃有聲。卒亦無聲。由問乃有知。卒亦無知。空空不必說。自狀其心之本體。卽就鄙夫說亦好。蓋鄙夫之空空。與聖人之

空空一也。

一說疑問補云、才問一事。此一事之理。洞然懸於吾前。空空如也。叩者叩此空空而竭之也。○融通正與前說不礙。慈湖云、無知者聖人之真知。而聖人之知實無知也。故以聖人之道爲可以知者。固未離於知。以聖人之道爲不可知者。亦未離於知。惟其猶有不可知之知。非真無知也。聖人之真無知。非知識之所到。非知不知。所能盡一言以蔽之。曰心而已矣。此心非知非不知。苟明此心。自然非知不知之所及。此之謂真無心。不得此心而求無知。愈無知。愈多知。又

云子思曰。雖聖人有所不知焉。心無異心。卽目視耳聽之心。手握足行之心。自是不可知。不可限量。不可形容也。義府云。聖人非有知而故辭之。實無知也。則何以能無所不知乎。曰。如目焉。見一處則不可見餘處。唯無見。乃無所不見。如手焉。執一物則不可執他物。唯無執。乃無所不執。故聖人之無不知。乃由於無知也。李湘洲云。心之精明是知。知之湛寂是心。心體湛寂。非知非不知。知不足以言之也。故謂之良知。若有知。則有不知矣。續葉敬君云。無知是夫子一生學問。十五志學。七十從心。都是無知。致知格物好。

古敏求只說夫子求有知。不知夫子求無知。續印云全體無故全體有。續

鳳鳥章

高中玄云、孔子思伏羲舜文之君而不可得見。又不
可以明言。故思鳳圖以寓伏羲舜文之意。意不在鳳
圖也。鳳圖是無聊之思。吾已矣夫。尚未肯絕望語。
續

一說管云、此夫子慨道之不行而起贊易續文之想。
也。易作於伏羲、演於文王。文王之時、鳳鳴岐山、伏羲
之時、龍馬負圖出於河、皆文明之瑞也。故不但以易

道經世。而亦以易垂世。聖王出則名世從而應之。今無此瑞。則世無作者之聖。而吾道亦莫之宗矣。故歎曰。吾已矣夫。然道雖莫宗。而斯文未喪。則羲文二聖之作。有不容於迷者。此夫子言外之意也。

子見章

此聖人動容周旋中禮。不期然而然處。見齊衰者。瞽者。與冕衣裳者。一般生敬。此聖人自然平等處。試想之。豈非是一團天理。續謝顯道常令朱子發聽說論語。首舉此章。及師冕章。曰。聖人之道。無微顯。無內外。由灑掃應對而上達天道。本末一以貫之一部論。

語只恁地看。

喟然章

楊子謂顏苦孔之卓非也。此是顏子有得之後。恍然狀出個道體來。正樂也。非苦也。仰之四句。卽是卓爾三句。非前未得而後始得也。宋儒謂顏子未達一間。又非也。道虛圓活潑。無在而無不在。原可過而不可從。可從卽非道也。非顏子真見道。不能狀出個末由也已。仰之四句。與卓爾三句。俱圖圖看。想顏子至此。不特文禮是筌蹄。卽夫子平日教示。亦都是假。故下個誘字。鄧文潔亦同子輦說。又云宋儒謂未

達一間。謂之一間。猶云隔壁之言。回於夫子。工夫生熟不同。略差毫末耳。如有所立卓爾。是顏子口中轉語。若以卓爲顏子得力境界。便死煞。非顏子之學矣。管云。雖欲從之。末由也已。卽夫子自道。過此以往。未之或知去處。乃乾元統天之學也。夫子所以有見其進。未見其止之惜。

子疾病章

末節語氣。言縱不得家臣治喪。以行大喪之禮。便至死於道路而不葬乎。深言不必如此。管登之云。夫子嘗從大夫之後。則以臣禮治其喪。亦非無辭。但春

秋之作。全在誅僭竊以正名分。而影用大夫之喪禮。乃身自犯之。則何以矯三家之僭而討陳恒也。故切責由如此。又云。是時子路必現臣季氏家。故其力能使門人爲臣。故云然。○理或然歟。

美玉章

沽之哉。沽之哉。我待價者也。便是用之則行。舍之則藏。曰求善價。則心已先動矣。聖人無一日不用世。子貢豈不見得美玉之論。非諷其沽也。是商量加何應用之詞。但不免微動於意。夫子則用行舍藏。無一日忘天下。而未嘗先與一天下用我之心。故曰聖

之時者也。沽之哉。三句一句讀。意實重沽。但沽亦須價至耳。今人不解此意。待字看得鄭重。將夫子一片易世之熱腸。寫作傲世之冷眼。試檢夫子一生行事。語言曾有一日不沽否。

九夷章

居夷浮海皆甚痛中國之詞也。或人之疑陋與子路之喜同。妄認爲真耳。夫子豈真能居九夷哉。又何必計及於陋不陋也。君子居之二句。就其言而反之。不與明言亦不堪深論。若着一死煞語。便是癡人爭夢矣。於子路曰無所取裁。於或人曰何陋之有。同是

一意而待門弟子與他人各極人情之至。

自衛章

古者宗廟朝廷房中之樂各有篇章。不相淆亂。使諸侯不得僭天子。大夫不得僭諸侯。春秋紊亂其制。卽不得詳考。然其太不倫者。亦不敢當。如甯武子不拜。湛露穆叔不拜。肆夏是也。當此之時。三家以雍徹郊。特牲曰。大夫之奉肆夏。自趙文子始也。雅頌之不得所甚矣。夫子正之。豈徒如樂書所云已哉。信如樂書所云。乃是正詩。非正樂也。按樂書云。南陔白華黍華。山與崇丘。由儀有義無詞。孔子序之於六月。正考甫得商頌十二篇於周太史。孔子列其六篇於周魯之後。其詞如此。雅

頌得所。正樂正也。此以樂之被於聲歌者言耳。曰
自衛反魯然後正。字字有意。見道不行而始退而剛
述也。亦見前此未正而今始正也。

出則章

高中玄云。他人只在形迹上看。必待沉酣頽倒。方謂
之困。聖人在心上看。稍過其則。便自知之。何有於我。
若自他人視之。依然動容中禮。何有一毫差錯。此正
聖人極精細。不可及處。非謙已誨人之謂也。字泰
云。常人求其說而不得。則曰謙已誨人。恐自有精義。
孟子說徐行後長。可以爲堯舜。衆人亦未必個個傲。

慢。也有徐行後長的。如何只是堯舜能孝弟。衆人却
不爲。此等處皆當致思。古人稱堯欽明文思安安。允
恭克讓。舜庸哲文明溫恭允塞。堯舜性之也。動容周
旋中禮。盛德之至也。夫子事父兄公卿。決不至失禮。
惟是當下一念至誠爲難。如允恭克讓安安。根於欽
明文思中來。溫恭根於文明中來。乃自盛德自然。便
是堯舜的孝弟。今人體面亦多不失。然一念之微。不
知與盛德自然。何啻天壤。於此見孔門之學。平實中
最精微。

川上章

聖人觸目是道。偶在川上而歎之。假令夫子而在山。
安知不以山歎道哉。若云道體流行。川流最肖。則失
之矣。本文只一句讀下。逝者句下一氣讀下。續
此等話與人。莫不飲食也。鮮能知味也。誰能出不由
戶。何莫由斯道也。一樣說是歎川。却不止歎川。說不
是歎川。只是歎川。知其解者。謂歎川可也。謂不歎川
可也。

好德章

便作有感而發。亦無不可。然閒說亦自佳。

爲山章

重一實上。不重由已由人意。不要把本文兩吾字粘着言。總見成敗只由於一念。

語之章

語時精神醒發。流暢活動。勃勃乎不能自己。處是不惰。蓋描出妙解的形狀。不可說行時不惰。若謂奮然欲行之意亦未是。與不解的人語。如水沃石。一味昏懵。無醒發。便是惰了。朱子云。顏子聽得夫子說話。自然住不得。若他人聽了。半疑半信。若在若亡。安得不惰。口義云。諸弟子得之於口耳。口耳之學。與身無干。故情得之於心者。自動於身。有所不能已。顏子

常自解云。欲罷不能。既竭吾才。

惜乎章

義府云。御史大夫李肅敏公嘗問余曰。此義公何如。看余曰。惜他尚涉程途。未得到家耳。公欣然曰。正與鄙見合。今人皆爲止吾止也之止。但知聖賢終身從事於學。而不知自有大休歇之地。則止字不明故也。又云。學道與行路同而不同。行路須是行而到家。學道則處處是路。處處是家。迷則是路。悟則是家。象山言論語上多無頭的說話。如等之字。予謂卽夫子所謂止也。此方是有主腦的學問。聖門亦不多見。

顏子方在手上。未得到手。然非無主腦者矣。夫子歎
顏子如此。其實此道原無止法。愈進愈無故。他日悅
斯之未能信。平日自按曰。何有于我哉。續

苗而章

學未至於成。時時莫可自必。今人知苗之必秀。而不
知亦有不秀之苗。知秀之必實。而不知亦有不實之
秀。觀二有。以夫說得煞是警醒。

後生章

四五十而無聞。卽依聲聞說。亦無妨。古人原不分
名實爲二也。不如今註云。我之今日。似不必粘我字。

是云安知不如今日之可畏。指後生言爲是。

法語章

亦從亦悅。只是不改不繹。全是個頑皮心性。如何着手。

三軍章

匹夫對三軍說。不可奪是志。可奪不是志。

衣傲章

人心忘則進。有則執。至於執。則非獨未得者。不能進。卽已得者。亦塊磊不化之物矣。夫子一則曰。何用不臧。再則曰。何足以臧。總是一般。前念爲臧。後念非臧。

四書說叢

正忘與執之間耳。老子曰：人知善之爲善，斯不善已。學問無窮，尚在語外。衣敝緼袍，與衣狐貉立而不耻，是極形容子路高明之胷次之詞，非實有是事也。終身誦之，亦非自足是據而恐失之意。然才有是念，則方寸亦滯而不靈矣。夫子點化，欲由認取子路却寶惜護持一念虛實全體天淵。續

歲寒章

疑問云：然後知三字應發揮。平居無事，無以知君子。直至時勢波蕩，人皆改節易行，然後君子可得而知也。後凋者不凋也。松柏不凋者也。曰：後凋是知松

栢者原。不知松栢也。歲寒知之耳。可勝嘆也哉。續李
九我云。只就松栢說。多少含蓄。聖人在川歎川。見松
栢說松栢。

知者章

各就其心體之無累者言之。非序之說也。重知者
仁者勇者上。

共學章

高中玄云。權稱錘也。聖人借以言之。苟有一毫弗類
稱錘者。卽非權也。曰自漢以來。無人識權字。然乎。曰
詎止漢宋人亦未識得。皆以爲常則守經。變則行權。

故其立言。且合且離。而不得其理也。然則何如。曰經者。權之衡。斤兩各具。星子有定。而不可易。如父子之必親。君臣之必義。以至其他。莫不皆然也。權稱之錘也。往來取中。變通而不窮。如親務得乎親之正義。務得乎義之正。以至其他。莫不皆然者也。蓋無常變。無大小。常相爲用。而不得以相離。若謂常則守經。變則用權。是常則用衡。而不用錘。變則用錘。而不用衡也。曰伊川云。經則是大綱大法。權者於精微曲折處。盡其宜以濟經之所不及耳。曰未也。夫權以稱輕重。非以盡細微也。正理所在。莫非經。稱之而使得輕重之

宜者莫非權。孰爲專立其大。孰爲獨盡其細。若曰經有不及而以權濟之。則可曰衡有不及而以錘濟之乎。曰朱子云。經自是經。權自是權。但漢儒權變權術之說。非聖人之所謂權耳。何如曰權自是權。固也。然不離經也。經自是經。固也。然非權莫能行也。彼權變權術之說。乃無衡之錘耳。何以云權也。曰漢儒反經合道之說。如何。曰經是何物。道是何物。旣曰反經。安能合道。旣曰合道。何謂反經。若曰反經可以合道。是背其星子而可以得分兩也。有是理乎。蓋經乃有定之。權權乃無定之。經無定也。而以求其定。其定乃爲

正也。共學至權始終只是一事。有可與未可與者。只是淺深生熟之候耳。非二事也。學以權爲準。學者學此也。適道者適此也。立者立此也。使不至於權。則所謂共學者。適者立者。亦徒然而已也。

唐棣章

一說象山云上節是說階級不同。夫子因反詩語而掃之。見雖有階級。未有遠而不可進者也。○此卽非正意亦自好。

鄉黨通義

王元美云。鄉黨聖人之用也。吾無隱乎爾。疑問云。

學而章是孔子自摹的小像。志學章是孔子自序的
年譜。葉公章是孔子自贊的行實。莫知章是孔子自
表的心事。此一篇是孔子彷彿模擬的行狀。先儒云。
鄉黨一篇分明畫出個聖人。鄒東廓云。只是精神命
脉。不曾畫出。愚曰。容貌詞氣。卽精神命脉之所發也。
大凡居鄉。居家。立廟。出使。接寮。采處。朋友。受賜。受餽。
飲食衣服。起居動止。至微至可忽處。各有個恰好的。
天。則在。夫子不待稱量。不待安排。言出便是。行出便
是。恰好與天。則合着耳。篇中所稱。件件有心去做。
今之道學先生。亦能之。只是自然而然。所以不可及。

慈湖云。鄉黨皆夫子之變化。如四時之錯行。日月之代明。人惟觀其變色屏氣。勃如蹶然。禮節紛然而不知。不可度思。矧可射思。自鄉黨至升車敘夫子言貌衣食行止交接。可謂曲折周盡矣。然終是有形之可見者耳。恐讀者泥之物而不神。故於末處拈出一時字。見夫子隨其日用活潑潑地。初無一毫意必固我於其間也。鄉黨得此一節。便都活。不然只是死板。此記者之點化處也。讀鄉黨者。知記者不能不記。又不能記不得已而強爲形容以記之。則思過半矣。篇中有實字形容之。不得而虛字以形容之者。

曰如曰似曰者曰爾之類是也。有一句形容之不盡而復一句以形容之者如恂恂如也二句君在踧踖如也二句入公門鞠躬恭如也二句是也。有一句形容之不盡而列數句以形容之者如使擯色勃二句過位色勃三句升堂鞠躬二句是也。有一句形容之不盡而層疊數語以形容之者如執圭首節是也。曰不見人之未必不而夫子不也。曰必見人之未必必而夫子必也。皆指其精神之所在也。通其意知其爲傳神手。不通其意子瞻所謂印板水也。夫子在鄉黨在朝廟及日用衣食起居雖累紙書之不盡。記者各

舉其影子言之。令其觸類以長耳。豈謂夫子盡於是乎。

鄉黨義無深解。今取其與舊傳小異者記之。

與上大夫言。與下大夫言。世人遂謂夫子時爲中大夫。非也。侯國之制。只有上大夫。下大夫。無中大夫也。夫子時或爲上大夫。下大夫。皆不可知。

左右手傳命以出。傳命以入。亦失考之過。此時賓主俱在門外立。不可謂之入也。

緇衣羔裘三句。禮曰表裘不入公門。則此必裘在內衣在外也。若云裘在衣上。便是表裘。而豈可用之視。

朝聘享大禮乎。

褻裘長短。右袂。以爲右便。作事非也。褻裘對上。用於公事之褻。說宜以褻裘長短作句。右一說作有。於理爲通。

寢衣長一身有半。取其半以覆足。非也。疑是度其身而半之。如今之着小衣以便寢者。亦非必齊衣也。似無錯簡。

齊必變食。朱子註不飲酒。不茹葷。乃莊子之說也。胡明仲論梁武帝曰。祭祀齊必變食者。食爲盛饌。一其心志。潔其氣體。以與神明交。未嘗不飲酒。不茹葷也。

朱子又曰致齊有酒非也。則禮有飲不至醉之說何耶。或曰葷是五辛之屬。非牲也。

不厭精不厭細。一說雖精與細。不厭飫而食之。卽食無求飽之意。

割不正。割乃宰割之割。而正者大夫無故不殺牛。士無故不殺犬豕。非所割而割之。卽不正也。如以爲切肉不方正陋矣。

醬非今醬也。內則中有數般醬。用之不得其宜。則能傷人。而以爲失備小矣。

食不語寢不言。特不自言語也。若有人問來。亦未嘗

不荅。

君祭先飯。了凡云。凡食以飯爲主。不敢以他物先之。故侍食於君。君祭已當供饌。不敢供他饌而先供飯焉。亦不敢以黍雪桃之意也。若君未食而先飯。恐無此禮。

瓜作必字非也。蔬食菜羹。瓜作句。禮云。瓜祭尚環。是其證也。

席不正不坐。非正方也。謂其向與已之分不相當也。未達不敢嘗。蓋卽其味以求達。非終不嘗也。

傷人乎不問馬。君李涪云。不音否絕句。問馬言先問。

人而後問馬。

君賜食。有親者。先問親。時夫子已孤。故先嘗之。非餒餘之說也。

東首。禮臣接君。必於阼階。病不能而東首。亦阼階之意。若曰。受生氣。豈獨君視之爲然。